

Yiu di e victima a mira con nan a mata su mama

FISCAL A EXIGI 17 Y 12 AÑA DI PRISON PA RUMANNAN HERNANDEZ CU A ASESINA MORAIMA GEERMAN

ORANJESTAD(AAN) -- Apesar cu e rumannan Hernandez tabata bisa cu nan no a planea pa mata Moraima Geerman, Juez y Fiscal no a kere nan. Juez a muestra nan cu e yiu homber di Moraima cu tabata drumi den e camber caminda tur cos a pasa, a mira tur cos y el a declara cu el a mira su tata Joeves Ramon Ramos Hernandez y su omo Roier Asaac Rodriquez Hernandez, tene cu mama riba cama caminda su tata a tapa su mama su cara cu algo y su mama a bay drumi.

Ayer maita famianan di e fayecido Moraima Geerman tabata sinta den tribuna di sala di Corte pa scucha e caso. Tabatin agentenan policial tambe presente pa evita cu cos lo por bay for di man.

Loke a sorprende tur hende tabata momento cu Joeves y Roier mester a drenta sala di Corte y e miembronan di famia tur a lanta para cu potret basta visibel di nan ser stima den posicionnan doloroso y a muestra Joeves y Roier esakinan.

Tratamento di e caso a dura basta ora caminda Juez mr. Behrens cada vez mester a hala e acusadonan nan atencion cu loke nan ta declarando den Corte no ta cuadra cu loke nan a declara caba na Polis.

Segun Joeves, loke el a declara na Polis no ta completamente berdad. El a instrui su ruman homber pa duna declaracion di tal forma cu e castigo lo bira menos p'e.

Durante interrogacion a bin sali na cla cu Joeves tabata casa cu Moraima y nan tin un yiu. Na dado momento a surgi problema den e bida matrimonial caminda hasta tabatin casonan di amenaza.

Un caso cu ayera tambe tabata punto di discusion tabata dia 25 di April 1998 ora cu Joeves a menaza cu un cuchio cu morto tanto Moraima como su ruman muher.

Joeves a bisa Juez cu el a saca cuchio no pa Moraima sino pa e ruman muher, kende e no tabata kier pa ta den su cas. Juez a muestra Joeves cu ora un hende saca cuchio pa un otro y bisa: "Mi ta bay mata boso awe" ta algo hopi serio. Ta asina cu Joeves a bay cera pa buracheria.

Pa loke ta trata loke a sosode dia 7 di September 1998, Ministerio Publico ta acusa e dos rumannan di premedita y intencionalmente nan a asesina Moraima. For di e declaracionnan cu e rumannan a duna na polis Juez por conclui cu Joeves a planea con e tata mata Moraima. Un dia promer cu el a bay busca su ruman homber caminda nan a bay bebe den Pacifico Restaurant y eynan a planea tur cos.

Segun Joeves, esey no ta berdad. El a bay busca su ruman pa e yud'e su siguiente dia pa hiba e auto di Moraima pa drecha na garashi. P'esey Roier mester a keda drumi na cas di dje.

Juez ta haya esaki hopi straño y a

remarca cu Roier mes a declara cu ta Joeves a planea tur cos. E plan tabata cu Joeves ta bay paden promer y despues e ta duna Roier señal ora e mester drenta den cas.

Dia 7 di September 1998 segun Joeves el a yega cas y a bisa Roier pa warda un rato y despues ta drenta cas. E motibo pa esaki segun Joeves tabata pasobra Moraima no gusta cu Roier ta keda drumi na e cas.

Na dado momento a surgi un discusion entre Moraima y Joeves tocante na relacion. Segun Joeves, Moraima a bis'e cu e no kier mir'e mas den cas y tampoco den e cuarto den cura di cas pasobra si su amigo, un agente policial, mester bin cerca dje, esey por trece problema. Joeves a sigui bisa cu el a puntra Moraima si ainda e ta cu e agente policial y Moraima a contest'e cu nunca el a lag'e. Joeves e ora ey a bisa cu e ta cu Moraima pa su yiu. Moraima e remarca si Joeves ta sigur cu e yiu ta di dje. Segun Joeves, esaki a pone rabia y el a dal Moraima. Ora cu Moraima kier a coy telefoon pa yama, Joeves a gar'e tene di patras y a tapa su nanishi y boca. Door cu Moraima ta sufi di asma el a stik y fayece. Ta e ora ey Joeves a bay cerca su ruman y a bise kico a sosode. E yiu homber di nan tabata drumi den e camber y el a pidi su



Joeves Hernandez

ruman homber pa hib'e. Ora e rumannan a lanta e mucha pa hib'e, e mucha a spierta y a mira. E ora ey el a dicidi di deshaci di e culpa di Moraima y a instrui su ruman pa hib'e.

Juez a remarca cu e storia cu Joeves ta conta no ta cuadra cu e berdad. No ta asina cu e mucha no a mira nada. Juez a muestra cu e mucha a mira tur cos. Nan a laga haci testnan pa mira si e mucha no a inventa un storia y tur cos ta muestra cu e mucha ta conta e berdad.

E mucha a bisa cu el a mira con su tata y su omo ta wanta su mama y con su tata a tapa su mama su cara y su mama a bay drumi. Ta asina cu e victima a lucha fuertemente pa Joeves no mat'e. Por deduci esey na e rascanan cu e tabatin na su cara cu ta muestra cu el a purba di kita man di Joeves.

Roier a hinca Moraima den Moraima su auto y a bay cune. Joeves a bay na cas di e mama di Moraima pa laga muestra cu ta Moraima a bay for di cas. Juez a bisa Joeves cu e tabata sa masha bon cu Moraima a muri pero a gaña.

Fiscal a bisa cu e ta haya cu e rumannan a planea e morto di Moraima. Tanto Joeves como Roier a admiti di a mata Moraima. E no ta kere nada di loke nan a conta den Corte. Despues cu Roier a laga Moraima canto di caminda den su auto, Joeves a bay yama amiga di Moraima pa haci manera cu e no sa unda Moraima ta siendo cu e tabata sa masha bon cu e ta morto. Despues el a bay na e auto y haci manera cu ta e momento el a haye. Fiscal ta considera esaki asesinato premedita y intencional caminda Joeves tabata esun cu a bin cu e plan y Roier a sigui e instruccionnan di Joeves. El a exige 17 aña di prison pa Joeves y 12 aña di prison pa Roier.

Famianan di Moraima no tabata contento cu e exigencia y a cuminsa murmura den tribuna. Abogado Flanders a muestra cu Joeves a worde maltrata pa dos persona dilanti Moraima y nan a hasta 'menace. Constantemente el a worde menaza y hasta a entrega keho na polis pero aparentemente



Roier Hernandez

door cu ta un persona cu tambe ta cana cu pistool, no a sigui cu e caso ey. E ta kere cu esaki a conduci cu Joeves a bay asina leu.

Abogado mr. de Bie a bisa Juez cu no mester bay tras di declaracion di e mucha. E ta kere cu e mucha ta confundi. No ta asina cu Roier a yuda tene Moraima. Roier a bay wak Moraima ora Joeves a cont'e kico a pasa. Aparentemente e ora ey e yiu a lanta. Juez a cera tratamiento di e caso y a bisa cu dia 30 di december pa 8.30 di maita e lo dicta sentencia. Famianan di Moraima a bolbe para y muestra e rumannan Joeves y Roier e potret-

nan di Moraima ora nan tabata sali for di sala di Corte y tabata expresa nan rabia pa e forma con nan a kita Moraima for di nan.

DOS CARA SO MI TIN!!

